

T5236.05/4462

125

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 20 1940

文苑英華卷第六百一

表四十九

陳情一 陳情表二卷英華所載
大年代先後今正之

陳情表一首

為人陳情表一首

陳情表一首

為水滸災異陳情表一首

為任虛白陳情表一首

陳情表一首

陳情表一首

初至益州上詔陳情表一首

辭益州刺史陳情表一首

文苑英華卷第六百一

表四十九

陳情一

陳情表二卷英華所編
失年代先後今正之

陳情表一首

為人陳情表一首

陳情表一首

為水潦災異陳情表一首

為任虛白陳情表一首

陳情表一首

陳情表三首

初至益州上訖陳情表一首

辭上滑州刺史陳情表一首



文苑英華卷第六百一

七

為崔僕射陳情表一首

代高尚書陳情表一首

為趙侍郎陳情表一首

陳情表

陳文帝時

沈炯

臣嬰生不幸弱冠而孤母英華非子零丁兄弟相長謹身

為養仕不擇官承襲朝命偶在亂世一作宦成梁冒危履

險自死輕生妻息誅夷昆季屠一作滅但餘老母一作餘

得逢興運臣母妾劉今年八十有一臣叔母妾丘七十有

五私一作門弟姪故自無人妾丘兒孫又久亡滅兩家侍

養餘臣一人前帝知臣之孤孑眷臣以州里不欲使頓居

草萊又復矜臣溫清所以一年之內再三休沐臣之屢被

丹款頻冒宸鑒非欲苟避一作朝廷遠離畿輦一者以

將六十四湯火居心每跪讀家書前懼後喜溫枕扇席無

復成童二者職居彝憲邦之司直若自虧身禮何問國章

前德綢繆始許哀放內侍近臣多悉此者正以選賢與能

廣求明哲赳赳荏苒未始取才而上玄降戾奄至今日德

音在耳墳土遽乾悠悠皇天哀此困一作極兼臣私心煎

切彌迫近時悽悽之祈轉忘塵觸伏惟陛下睿德聰明嗣

興下武刑于四海弘此孝治寸管求天仰歸帳一作宸有

感必應實望明時一作特乞霈然申其私禮則王者之德

覃及無方矧彼翔沈孰非涵養云

為人陳情表

陳子昂

臣某言臣門衰祚薄少遭險豐行年三歲嚴父早亡慈母

鞠育哀惇相養臣又庭羸少多疾病集作疹零丁孤苦僅得

成人老母愍一作憫臣孤薄恐不能負荷教誨師氏訓以義

方家貧無資績紡集作紡績以給束修衣褐並出母指臣既無

姊妹寡有兄弟衡門獨立惟形與影母子相視惇惇靡依

罹此艱虞歷二十載臣稍以成立忝跡朝班薄祿微資始

期色養私情獲遂集作既獲母子同集作相歡殃罰不圖老母見

背攀號何及泣血漣而于時日月非便集作宜權殯京兆歲

序速遷於今若干年臣本貫河東墳隧無改先人丘壠桑

梓猶存而老集作亡母客居未歸舊土宿草滋蔓集作成列拱樹

荒涼興言感傷增以崩咽今卜居宅兆將入舊塋明年吉

辰最是良便過於此際未有尅期臣謬齒王人職在驅

今歲奉使已至居延單行虜廷絕漠千里臣雖萬死無答

鴻恩恐先朝露有負老母集作眷知伏惟陛下仁隱自天孝思

在物哀臣孤苦降鑒幽微集作冥使臣來年得營葬具且斬

草舊域合骨先墳保送羈靈獲申子道烏鳥之志已集作獲

遂私情遷舉事終集作遷定事早馳影奔赴雖其集作即殞歿甘心

無恨集作憾云云

陳情表 高宗 員半千

臣某言臣貧窮孤露家資不滿千錢乳杖藜糗朝夕纔充

一飯有田三十畝有粟五十石聞陛下封神嶽舉英才唐書

作豪英一作英才貨賣以充糧食奔走而歸帝里京官九品無瓜

葛之親立身三十有餘志懷松栢之操不能糴賤販貴取
利於錐刀卧酒隻雞求舉將何以辨投匭進欵奉勅送天
官捧以當心似懸龍鏡家之以守若戴鼇山於今立身未
蒙一任臣恨不能益國死將以選地不賜臣一職剖判疑
滯移風易俗以報陛下深恩若使臣平章軍國燮理陰陽
臣不如稷契若使臣十年成賦一代稱美臣不如左太冲
若使臣荷戈出戰除兇去逆臣不如李廣若使臣七步成
文一定無改臣不愧子建若使臣飛書走檄援筆立成臣
不愧枚臯陛下何惜玉階前方寸地不使臣披露肝膽抑
揚辭翰請陛下召天下才子三五千人與臣同試詩策判
牋表論勒字數定一人在前疑作先者陛下斬臣頭粉臣
任鬱結之至

為水潦災異陳情表

武后

李嶠

懸於都市以謝天下才子望陛下收臣才與臣官如用
臣芻蕘之言一辭一句敢陳於玉階之前如棄臣微見即
燒詩書焚筆硯獨坐幽巖看陛下召得何人舉得何士無
任鬱結之至

臣嶠言臣聞明主程才先求於稱職忠臣効用必務於量
已然後庶官無廢百度以康若使假鳳登朝真龍不馭將
緣鶴之鼎方憂於折足和鸞之駕必誠於傾軛豈徒鍾鼓
生祆蠻夷起笑而已臣瓶筲賤器駑蹇輕姿同鼯鼠之五
伎不成異飛鴻之六翮兼備遭逢幸會累叨階級陛下降
非常之澤垂不次之恩昇之冢司握九流之銓管委以樞

近叅萬幾之損益傳說作舟之命徒奉箴規仲山補衮之
談曾微答効致令衡鏡失序紀綱不張官僚日僧府庫歲
減謬職之謗或譏於畫武續貂敗官之尤有議於誼盧吠
鵠韓盧宋大名鵠或作鵠非下生朝野之嘉上悖陰陽之和水潦為災
慮深於昏墊黎氓失稔憂在於溝壑軫皇情於南面墜國
庾於西成虧燮理之則失平分之度推其咎戾實在微臣
昔者堯逢阻饑而四岳咨訪漢遇災異而三公策免舉遺
才而求俊乂退不肖而清庶官厥有由來著于古昔臣緝
熙莫効尸曠無成以擁腫之凡材抱支離之痼疾久懷致
寇之祿猶帶妨官之綬覩目而視不遑自安是用啓處漸
惶寢興誠惕思解鵠鵠之服願辭鵠鷺之行庶得保愚

之履避賢者之路以寧眾口之囂謗以答三靈之譴咎
物情朝序誰不謂宜昔干木辭第恒思衛生營平寢瘵不
忘憂國當今兵戎未靜費務方多人庶空虛官僚苟且不
可不深為防慮妙思政術臣銜恩佩德念咎慙榮雖智効
無聞自其於罷黜而庸短所見猶樂於輸畫不勝區區之
意謹昧死陳利害事一封幸當明主不諱之朝敢効愚臣
無隱之節倘蒙赦其狂直收其固陋乃冀有益纖芥効添
山海無任悚懼懇誠之至謹詣朝堂奉表陳情以聞

為任虛白陳情表

吳少微

臣某言臣亡父某昔在聖朝累蒙進任丞丞麟閣續校秘
文衛迹鳳池翊謀神化內陳青瑣之拜出有朱輪之寵何

其休哉而恩榮未報豐禍潛起闔門而就拘連頸而待戮
陛下發雲輅一作雲霓之彩迴霜電之威捨過好生全棄
嶺表一蒙渙汗欣借命之恩萬里奔波無乞骸之望竄身
邊裔皓首荒隅以臨年之危坐炎方之瘴雖欲勿死其可
得乎遠謝闕庭奄先泉路旅襯期朽今猶未還興言血下
號懼交集臣某中謝陛下通天之歲復降恩勅追魏某崔
某及臣亡父等赴都元忠或入處台相出臨藩牧門庭懼
軒組之榮妻子厭梁錦之美其李乙雖死亦蒙贈官子某
又登微一作顯職惟臣一門之內存亡俱不霑恩臣之不天
亦胡顏上訴然比生則孤臣豈敢同死則存李獨優皇天
平分豈其偏施伏惟皇帝陛下惠育羣生無幽不燭臣之

孤苦皇天所鑒父終嶺外喪在關中宇宙雖廣無一塵之
地弟妹幼稚絕斗春之儲兩樞雙鳧未遑安厝臣所以鯁
情割懇忍而未死者竊爲此耳倘雲雨之賜復潤無私則
南有歸來之魂北無高堂之位臣之罪也不任萌迫之至
謹奉表以聞輕觸宸嚴伏知待罪

陳情表

玄宗

張文成

開元初

萬死糞土臣文成言臣忝朝班幸蒙驅策不了一使罪應
至死自可鉗口吞聲伏待刑書灰身粉骨甘從斧鉞豈可
昆蟲惜命雀鼠貪生區區微心有所未盡臣平生好學頗
愛文章雖不逮於詞人濫流傳於視草近來撰集詩賦表
記等若干卷編集擬進繕寫未周負謹明時方從極典恐

士衡止息華亭之嘆不聞稽康顧影廣陵之音永絕缺簡
零落抱痛幽泉昔司馬遷請就腐刑以終史記漢武帝敷
其至懇矜而許之伏願陛下遂臣萬請之心寬臣百日之
命集錄繕寫奉進闕庭微願獲申就死無恨然則歸罪廷
尉肆諸市朝腰領橫分有同仙化一作苑肝腦塗地百代如
生骸骨埋塵千載不朽無任迫切之至

陳情表

已見五百七十九卷

張說

第二表

已見五百七十九卷

前人

同前

蘇頌

臣某言臣伏奉今月十三日制鑾駕閏九月十日幸長安
陛下東封禮還西賓係望顒顒品物不獨耆老屬黃髮

聖翠華時邁制書爰降懇願咸達相聚忻躍不知所裁跪
誼路衢聲溢歌頌若臣者奉辭軒屋縈疾鎬京常恐先犬
馬填溝壑朝聞既獲瞑目猶生臣某誠歡誠喜頓首頓首
死罪死罪臣彌曠旬深官曹事缺乞解見職罄陳前表又
伏奉今月五日勅以番司務閑不妨醫療所請辭官不須
者臣志不動天身何容地周章慙悸惶駭戰慄退則恩被
羽翼德均造化臣之不敢止也進則匍匐罕遂支羸蕭然
臣之不能任也臣所進退失守涕洟嗚咽宜其重請骸骨
豈可虛榮省署竊以鴻私俾療成貸特矜日夜翹清蹕之
途炎涼近素秋之節臣希眇視跛履手之足之覬憑渥以
還竟輒延慈而待罪不勝悚踴惴懼之切謹附起居使朝

議郎右補闕內供奉臣李鄰奉表以聞臣無任

初至益州上訖陳情表

前人

臣某言奉辭闕庭馳詣州府以某月日上訖臣某中謝臣
稟識愚妄受恩忝越十有四年中書省三命承明廬臣竊
比方倍逾於是特編皇揆不以人進久於近密衆莫過臣
厚施如丘山微功罕絲髮遂叨宰弼莫允瞻望心慮何補
血誠徒勤陛下深慈矜愚至德念舊以臣頗習儒訓更超
宗伯臣益用慙負匪遑底寧豈悟西南重鎮巴蜀粵壤爰
雜縣道且聯軍戎付臣兼之才實不逮審疑作竊自能省聖
經聞徹誠謂憑威可盡力諭指期致命臣敢辭事誰云効
忠及當官而行臨事益懼者竟乏邊鄙之筭倘貽朝廷之

其於靜人蠲役懲吏抑強惟國之政庶臣能勉流波
浦而嗚咽玄鷲辭巢而顧慕况若臣者最蒙聖渥雲山前
里霄漢獨遠載惕拜章失圖無任

辭上滑州刺史陳情表

李邕

臣某言臣素無藝能積負訕謗衆口之多自可銷金怨雙
之心每堪殞首伏惟陛下至明大聖察之纖微淳德上仁
洗之瑕穢山川納者不擇薰猶天地覆之是霑雨露且久
荷惠渥大底官榮今臣蒙國用累及軀命事出涯分之外
恩加父母之深已逝之竟復歸朽質既存之地更忝高班
雖欲殺身未能報德彌慚持祿有以保名秋鷲將辭必徘徊
於大厦老馬離秣終顧步於華軒况臣今茲六十有七

光陰荏苒行止歎危就木之時未知幾日懸車之歲僅有三年不任遠涕戀之至

爲崔僕射陳情表

代宗

于邵

臣某言臣聞行師命將必先保大服戎共武方議膚公所
以協和軍蒐戡定時難伏惟寶應元聖文武皇帝陛下誕
膺天命以撫方夏洪惟眷圖用征不惠上敬天授下咨人
力則殊方異俗罔不率俾蠢茲西戎猶肆逆命勞我薄伐
示人有征夷不亂華自宜殄滅盈不可久神亦禍淫天之
道也臣近得上都所由報狀伏承受相府元帥之寄領漁
陽突騎之衆分邠土鎮守之師內無所疑外無所怨上讓
下競禮合義均不爲身謀同獎王室此皆陛下明爲元首

德洽蓋臣夷吾必知其小大孔明遂均於魚水不然豈
德度力偶俱無猜以此討戎何戎不滅以此論道何道不
平臣蒙國寵靈榮加九族功慙白馬位達綠車每承聖敬
日躋輒願殺身是効今日之會實契丹誠無任感時惘歎
之至謹遣某官奉表陳情以聞

代高尚書陳情表

臣某言臣本凡才智畧無取因緣際會驟歷班榮分闔尹
京實爲塵忝頃者鳳翔之日蕃漢憑陵臣嘗激勵羗渾竟
勦戎虜方將席卷求息邊虞旋奉德音遽令入奏微誠莫
展殃疊已鍾痛骨摧心載崩載咽荼毒未幾起復舊官累
表陳乞不蒙允許及犬戎構禍憑凌京城陛下授臣檢校

刑部尚書都知元帥中軍兵馬使雖承恩命未有軍行麾下之人纔盈數騎空懷赴難莫克使綏仰天惟心伏增憤激不踰信宿便屬蒼黃未知鸞駕東巡且欲荆襄陪扈累遭剽掠始達藍田更逢子儀留臣計事招集亡散共收上都比至入城又奏臣住奔波險阻契闊山川進慙將帥之臣退羞羈絏之僕顧惟狼狽寢寐兢惶臣某誠惶誠恐稽首頓首死罪死罪今又亡母在殯欲祔舊塋先遠戒期正當此月干戈之際寇盜爲虞小有不安永負生疑作母願終子道以奉亡靈倘封樹有成雖殞越無恨伏望許臣畢事之日得令奔走陝郊碎首行間甘心罪責無任兢惕屏營之至

爲趙侍郎陳情表

臣某言臣以固陋累蒙獎擢猥廁朝列與羣賢並始自給事驟遷侍郎贊貳冬官典司邦教屬師旅之後庶政從權會府舊章多所曠廢惟禮部兵部度支職務尚存頗同往昔餘曹空閒案牘全稀一飯而歸竟日無事此臣所以寢興長想俛仰增慙何則受恩至深報德無所未裨毫髮虛費稻粱伏以人君命官期於述職人臣量力不叨非據寧有食君上之祿爲保妻子之謀臣內顧塵忝尤增愧懼頃陛下躬決庶務萬方不言而理遠近承式幸當天下無事未敢上塵其愚今承嗣背德阻兵全魏靈曜失道謀亂大梁犬戎爲患德虜伺隙雖禍盈惡稔終冀泉夷而調兵轉

粟在彼疲弊乃羣下憂國之日微臣赴難之秋况諸道牧
守闕人頗衆是敢不揆薄劣特析任使如或領一郡或統
數城綏懷將卒招復逃散近當狂寇俯制奔衝必使人業
耕桑盜無充斥昔子建之表愁求自試充國之對無踰老
臣豈徒冒寵干榮實欲酬恩立節臣年甫知命筋力猶強
策勵駑蹇庶成萬一無任懇悃迫切之至

文苑英華卷第六百一

文苑英華卷第六百一

表五十一

陳情二 自叙附

爲河南魏尹謝官陳情表一首

劉相請女婿潘炎罷元帥判官陳情表一首

謝試秘書少監陳情表一首

爲崔大夫陳情表一首

爲王戶部叔文陳情表一首

爲崔相陳情表一首

爲僕陽公陳情表一首

自叙表一首

出官後自叙表一首

為河南魏尹謝官陳情表

代宗 常袞 廣德元年

臣少遊言伏奉恩制除某州刺史尋即有替又蒙恩除臣

河南唐書作京兆是尹澤及遐荒榮露枯朽以驚以惕載忭載歡

臣少遊誠歡誠喜頓首頓首臣名無德稱官偶時來政謝

有經文慙無害朝恩早竊班命累塵每食皆浮何官不曠

四三年內榮至崇高萬一分中効仍微薄踰涯若此招損

宜然頃者獲罪于天躋身無地曲承鴻霈仍佐隼旟省揆

責輕寢興憂負豈圖招洗瑕穢發生羽毛不次之恩九霄

橫落無階之位四裔超登開散皇明龍銜巨燭捧酬玄造

鼇戴崇山且河洛軍興疑作京尹寄切念臣術非鈞鉅識

昧平反將何以肅清姦回董正人吏自蒙獎擢願覲天

限以阻脩未承勅命傳聞尚惑疑作感奔赴終勤以七月

日發自渠州星言即露久冒炎瘴因成癘疢行役支離轉

加沉瘵隙光是迫草露將危今月四日乘輿至漢中尋問

醫藥直省王許佺至奉宣進止促臣行程震威俯臨精蒐

飛散進退無措屏營失圖即以今日驅策殘骸載馳鳳閣

猶冀獲全餘喘祇謁龍顏犬馬之疾久纏螻蟻之誠愈結

無任感戴懇迫之至謹因直省王許佺迴謹奉表陳謝以

聞臣少遊誠惶誠恐頓首頓首謹言

劉相請女婿潘炎罷元帥判官陳情表 代宗

王諫

臣晏言臣實允淺謬典樞衡元元未安庶政多闕消塵罕

錄尸素空慙臣女婿元帥判官駕部員外郎知制誥潘炎
入侍幃幄又司戎政嫵疑之地顛沛是憂頃者累表陳聞
冀炎得歸省闈不謂天聽未達尚阻愚誠內懷氷炭若墜
泉谷臣某誠惶誠恐臣聞統天下者以天下舉直錯在不
私其親故能啓至公之門塞羣邪之路伏惟元聖文武皇
帝陛下紹休聖緒惟新寶曆內釐百揆外清四海鷓鴣之
士充庭漸階而臣與潘炎俱忝近密兵權國政在臣二人
是使惡炎者易爲辭嫉臣者易爲毀倘炎獲戾臣無以見
雪脫臣遇謗炎無以自明此臣所以寤寐兢惶罔知攸止
昔霍光爲大司馬長女婿度遼將軍范明友次女婿羽林
監任勝爲東西宮衛尉威勢崇重冠於一時不能抑退卒

是傾覆前史所惡書而貶之又劉弘爲鎮南將軍事時胡
廷以其女婚夏侯陟爲襄陽太子弘表陟親戚舊制不得
相監有詔聽從竟免禍敗先賢所尚美而書之臣雖才謝
古人智不經遠每憂覆餗大懼妨賢竊惟瓜李之嫌寧望
桑蘆之許一作訴今是以瀝肝上請昧死聞天必元帥籍炎
諮謀則臣其引退如或廟堂留臣擇用伏願終許罷炎庶
遂劉弘之心無成子孟之禍無任懇願迫切之至

謝試秘書少監陳情表

蕭華

臣某言伏奉制書以臣試秘書少監恩出意表榮超望外
臣循涯揣分以慙以悚臣華中謝臣素庸懦又乏智謀進
不能殺身以自明退不能拂衣以遠禍蒙昧昏虐僂俛歲

時每讀李陵之書備見前賢之意以為虛死不如立節成名不如報德常恐溘先犬馬湮沒羯胡上負君親之恩下貽妻子之耻何嘗不仰南雲而歎息瞻北闕而銷魂偷生苟安蓋所以誓將骸骨歸死朝廷伏賴陛下察以愚衷每垂保護遂得潜通間使遠詣官軍收金州而功不踰時掃餘孽而兵無血刃陛下矜臣一介之節捨臣萬死之罪念臣簪履之舊納臣葵藿之誠許歸故國之田園退守先人之墳墓則在臣之志願榮望畢矣陛下之聖恩於臣深矣豈期皇慈廣被玄造曲成拔臣於泥滓之中致臣於雲霄之上已蒙殊獎遽典雄藩旋沐厚恩復登蓬閣空慙有命竊愧無能將何以發揮儒林潤色鴻葉稠疊恩意感戴難

勝豈臣隕越所能上報無任悚荷屏營之至

為崔大夫陳情表

代宗

李舟

臣某言臣素以庸虛百無所取肅宗委臣方面擢尹兩京蓋以天寶末年祿山干命臣未有職位客遊陳州賊兵過河官吏奔竄臣義集驍勇亟摧賊鋒以閭閻之人當幽薊之卒勢相懸倍不顧死亡臣之輕生實著誠素今者廻紇代立求援聖朝陛下大布皇威如其用禮爰膺將命實受寵光又其道路無虞夏一作虜帳尤近擁旄伏節持憲珥貂銜非常之詔書寵內附之蕃落去獲重貺歸成大勳雖潦倒之人衰朽之士亦宜據鞍增氣叱馭前驅况臣常在軍戎未至遲暮豈不欲保微臣之富貴求陛下之恩私哉其

理必至煎沛必至廢闕隱而不露何以事君臣往在宣州
曾卒得痼疾三日三夜都不知人自此已來發無時候或
輕或重或疾或遲此病所來得於風熱常因冒暑失食及
冬衣太溫兼食羊肉立即發動若過積之後更無菜蔬苦
寒之地須加狐貂又於藥物不得及時則微臣不得全活
且螻蟻之命誠何足言但恐敗事有失前期稽恩廢禮伏
願陛下以臣此表偏訪朝臣言若涉虛事近辭避伏願加
以斧鑕肆諸市朝且使將來永息欺詐無任哀懇迫切之
至

爲王戶部叔文陳情表

柳宗元

臣某言臣母劉氏今月十三日忽患暗集作音風發動狀候

非常今雖似退猶甚虛憒驚惶憂苦不知所圖臣惟一身
更無兄弟侍疾嘗藥難闕須臾伏乞聖恩停臣所職今臣
見在家扶持其官吏等並已發遣訖臣以庸微特承顧遇
拔自卑品委以劇司夙夜驚惶惟思答効至誠至懇天睠
所知豈慮未効消塵遽迫方寸以開塞重輕之務加焦勞
皇集作憂惕之懷雖欲徇公無由枉志况忠孝同道臣子一
心許國誠切於死生報親忍忘於顧復進退窮蹙昧死上
陳候毋劉氏疾疢小廖薰微臣驚蹇再効無任惶懼懇倒
哀鳴類表作之至

爲崔相陳情表

白居易

臣植言臣有情事久未敢言今輒陳露伏增戰 臣亡父

某官亡妣某氏是臣本生亡伯某官某贈某官臣今承後
建中初德宗皇帝念臣亡伯位高無後以猶子之義命臣
繼紹仍賜臣名嗣襲雖移孝思則在上荷君命俾集作承
繼絕之宗中奪私恩遂阻劬勞之報歲月曠久情禮莫申
自去年以來累有慶澤凡在朝列再蒙追榮或有陳乞皆
許廻授况臣猥當寵擢謬陟台階爵祿之榮實有踰於同
輩顯揚之命獨未及於先人飲泣茹悲哀慙兩極臣今請
以在身官秩并前後合叙勲封特乞聖慈廻充追贈倘允
所請無幸於斯則臣烏鳥之心猶再生而展養犬馬之力
誓萬死以酬恩踏地仰天不勝感咽披陳誠懇煩黷宸嚴
無任惶懼激切之至謹奉表陳露以聞

為濮陽公陳情表

李商隱

臣某言臣聞事君以忠者所宜効死食君之祿者亦戒妨

賢苟非內慊私誠外憂官謗則安肯固辭武節強委侯集作

信圭拒七命賜國之榮捨萬里封侯之策必知不可安敢

無言臣某中謝臣因緣代業遭逢集作聖時竊常集作有

志四方不掃一室奉隋武之家事無愧陳辭慕鄧傳之門

風不傷清議屬者每憂不試深耻因媒自薦之書朝投象

魏殊常之澤暮降芸香其後契濶星霜羈離戎旅從軍王

粲徒感所知掌檄陳琳亦常交辟呂元膺東周保釐之日

李師古太平畔集作叛集作渙之時潛入其徒盈於留邸臣此時

尚持白簡猶着青袍元膺知臣傳劔論兵本於仁信佩鞬

插羽亦識孤虛俾以發姦假之捕盜幸無容忍以及焚巢
旋帶銀章俄分竹使隼旗楚峽出以分憂熊軾鄖城忽然
通貴豈意復踰五嶺更授丹麾中門叨相青宮忝司緹騎
纔通閨籍又處藩條越井朝臺備經艱險貪泉滇水益勵
平生是甘馬革之言常懼武皮之誚及聖造遠流南極許
拱北辰黃犢留官胡牀掛柱如生羽翼若出嬰羅誓以歸
彼冗員處之散地俄以朝那闕守昆壤須人一去闕庭五
雁寒燠處京畿五百里之內控番寇數十州之多提鼓燒
烽增埤濬洫雖國家遠追集作上策不事交爭然虵豕難
防犬羊易縱苟罷嚴徹警則負約渝盟臣自受命以來爲
日斯久未嘗一日不修戰格未嘗一日不數軍儲使士有

聞
聞心人無虛額使之偵候咸亦聞知尚未能率勵驍雄摧
磨鋒鏑遠收麻壘直取艾亭成大朝經武之威畢微臣報
主之分可書竹帛不辱旂常盖以久處炎荒備薰瘴毒內
搖心力外耗筋骸雖馬援據鞍尚能矍鑠而班超攬鏡不
覺蕭衰恐無以早就大功久當重任自思已熟求退爲宜
伏惟皇帝陛下道冠百王功高三代照臨若日覆露如天
况今國不乏人特稱多士有才畧在臣之右齒髮少臣之
年俾代處是邦迺臨斯位以之責劾誰曰不然俾前達後
生皆無蔽滯由中及外得以交相成陛下適時之方減微
臣固寵之責臣不勝祈恩懇迫之至謹差某官某奉表以

自叙表

李嶠

臣嶠言奉今月十七日口勅令臣等各自述行能進者臣以蒙鄙遭逢休歷陛下降非常之遇垂不次之恩擢處崇班超登近侍上感皇明識遇之厚下憂忝冒負乘之責常願肝腦塗地以報所天魂魄歸泉不忘結草至於欲披誠款曲盡智能竭心本朝輸力明主此臣日夜之所思念曾襟之所蓄積豈敢更爲進退苟事廉隅固守撝謙坐飾邊幅臣早遭凶閔素甘賤貧少纏羸疴不任勞苦從仕代饑寒之役徇祿無顯達之心脩身懼於辱先履道期於遠害見強禦之爲患也故處之以謙卑知刻薄之爲尤也故行之以仁恕慕退讓不敢從馳競之流戒貪殘不敢爲絲髮

之犯若乃溫良誠信之道忠孝友悌之規莫不仰承聖訓俯蹈家訓采太平之名教移中人之志業及其屏私昵忘比周内無術數之機外絕朋附之黨一心奉主介然孤立此臣之所以登朝廷而事明聖全直道而勗身名者也夫臣事君有死無二見危則致其命當事則先其勞有罪不敢辭有能不敢隱是以西戎不靜充國自銜其謀南越未賓終軍思赴其難臣幸蒙採擇得備驅馳若使飾固陋之心竭駑蹇之用勉之以匪懈將之以至公則雖簿領百端樞衡衆務亦淺深而必効何難易之敢辭哉蓋明主程才以建官忠臣量已以受職是故輪轅異適水火殊用當其材則事逸而功倍乖其分則形勞而績虧陛下棄短收長

循名責實使得効其薄伎申其末用則臣之淺術可得而
言臣曾涉經典篤好文史漸六藝之腴潤馳百家之閭闕
至若操觚秉牘紀事屬辭雖竊比老彭誠未擬於先哲而
上追班馬敢自強於後進陛下以欽明撫運齊聖握圖冠
千齡而首出超百王而高視德澤汪濊典章明密至道共
八風俱翔神功與四時並運是以衆庶悅豫符瑞膺饗九
服清夷百蠻職貢而嵩高粱父未循疑作修昭報之壇禮官
儒林不輯昇平之頌使鴻名有時而鬱良史靡得而稱臣
竊懼焉昔成康之隆頌聲並作武宣之盛文章間起虞德
茂而臯繇作歌魯道興而奚斯有述然後功業顯乎代德
音昭乎聲若夫保馭中和憲章大雅通諷諭之旨抒嗟歎

之懷此臣子之舊經國家之前式不可闕也臣幸得沐浴
恩造扶持軒遲日覩邕熙心積憤蕙思陳愚瞽庶存萬一
徒以牽迫賤事卒卒無須臾之閑頓伏疋羸軋軋多沉滯
之恩常恐犯霧露填溝壑不獲贊揚上德攄布下情生爲
負義之人死爲孤恩之鬼是用終朝三省達夜九迴撫心
刻意屏營反側倘得叅名芸閣假跡蓬山探石室之祕文
覽金版之遺籍聽歌探頌以觀四方之風講藝論詩以崇
三代之式第其科目載之簡編大以薦陳郊廟報享成功
小以敷布樂章潤色鴻業使宏勳播於金石盛德流乎舞
詠光濟於當日洋被於來葉然後退沒草澤下入幽泉猶
生之年也冒陳愚懇惟我陛下察焉臣嶠誠惶誠恐頓首

頓首

出官後自叙表 德宗

齊映

臣某言伏以臣之依君猶子之依父若心有憂患口不陳聞則是孤負恩慈自取禍敗臣某中謝臣去八月十九日陛下賜臣陰官詔云漕運成功擢居東掖者臣俯慙光寵上感聖明粉骨糜軀匪申報効臣昨當都主運之日是上都闕糧之時賊光未平蝗蟲方甚臣於河陰領米分付陝州務相催驅不敢迴避其時王事至切臣官最早臣心雖守謙恭公事亦多抵誤猶蒙陛下遣段日暹宣慰於臣處事之難臣有微功實由一大庇及臣延英對日不敢一言自陳怒臣者疑臣以張身勢憂臣者料臣必投魘魅今臣貶

官自緣親累聖恩猶與七上州自然宿怒未平因恐小人承便臣既在遠還固易誣訕則呼天實在今日憂之切者謹陳一端往者張鎰在鳳翔之時奏留都營田副使張信之得罪自為犯賊以臣不與往還於臣便生疑怨一昨秋夏之際張信之多在上都自臣貶黜已來不知今向何處但慮知臣在近又知執政惟臣必恐求媚取容構虛逞怨倘有罪戾聞於聖聽乞降三司審推則臣萬死無恨方當黜責猶恃恩私仰望天顏實如咫尺無任憂迫恃恩之至

文苑英華卷第六百二

文苑英華卷第六百三

表五十一

請致仕

一 致仕表二卷英華所編
失年代先後今正之

為閻大將軍乞致仕表一首

代人乞致仕表一首

為太僕卿劉弘基請致仕表一首

盧岐州請致仕表一首

代劉幽州請致仕表一首

為殿中監趙元楷請致仕表一首

為工部尚書段綸請致仕表一首

為姚大夫請致仕歸侍表一首

為溫給事請致仕歸侍表一首

爲王左相請致仕表一首

爲閻大將軍乞致仕表

後周

庾信

臣某言臣聞禮云大夫七十致仕於朝傳家於子膳則貳
珍衣稱時制臣自出身奉國四十餘年遭遇風雲從微至
著太祖文皇帝扶危濟難奄有關河臣實無堪中涓從事
自洛食風塵河梁旗鼓華陰有白馬之兵河曲有黃沙之
陣臣雖用命不能竒策功薄賞厚因人成事恩澤年表常
以愧心仰逢周朝以揖讓登庸謳歌受命主貴臣遷頻煩
榮寵三槐以鑄鼎象物知其神姦五等以桓珪飾瑞守其
宮室臣以何德兼而有之况復水土之職王梁以應識受
徵兵戈之王韓信以登壇獨拜語其連類臣又何人當今

四海未寧三方鼎峙陛下勞心之日羣公展効之秋而
甲子旣多耄年又及無參賓客之事謬達諸侯之班尸祿
素餐久紊彝典負乘致寇徒煩有司加以寒暑乖違節宣
失序風水交侵菁華已竭雖復廉頗強飯馬援據鞍求欲
報恩何能爲役榮啓期之樂適足自貽燭之武之言無能
爲也特乞解所居官言從初服事符骸骨之請非謀几杖
之賜若臣北陵移病東臯歸老山河茅社一反司勳公侯
珪璧還封典瑞則朝無冒位之人臣免妨賢之責虞氏養
老敢希東序之榮周朝如荼豈望西郊之禮但瞻仰天威
方違咫尺徘徊城闕私增悽戀不任知止之情

代人乞致仕表

前人

臣溯言臣聞一葉將隕寧待於風露百川皆到自竭者潢
汚臣輒感之以悲以咽臣某中謝臣仲春之末舊患漸加
雙足頗蹇四支不利扶步有邯鄲之失勉視無離婁之明
安可率此留務溷茲恒典陛下恩周曲成未忍捐棄微臣
困至於亟轉不堪勝臣所以自咎自傷淚繼之血臣某中
謝臣特承先緒進不因人陛下憫臣無用舉直而有顛自
奉圖太極宣綽中書陛下收臣於一心任臣以獨掌九年
冀登宰輔八歲載踐宗伯出擁干旄入忝衡鏡或雲臺之
上微臣預疇咨之旨或日觀之下詔臣操刊勒之文美而
暢之臣實尤忝明憲不敢以纖負玄造竟微於滴助

日月

其如氷炭交集誠懷伏以前陪政事親荷德

音謂臣等經侍軒墀子孫尚延保護臣荷螻蟻欲戴

一作款載

非丘山臣宜生亦盡命死且陳力竊不知終而不知止朝

列三數與臣同儕臣未六十推臣則幼獨臣彌當

一作留頓

頓病不俟年盈量窮涯滿而招損逾時每乖於勿藥未日

猶繫於苞桑覽分必然貪榮所忌伏乞免臣見職退畢餘

生察臣榮不可支矜臣分不能強廼臣之幸也豈悟仁壽

之闕有此一時承明之廬無緣再謁心神已弊畧刻增悲

叨睿鑒則多士莫先違聖顏則小臣何遠惟冀三條啓道

一作路

萬乘巡京悅西怨之羣黎逮東封之從者危寃倘駐

枯骨如存是臣之愜非臣所望臣又聞驅奔効駕先輟於

羸駘翔集賀成近遺於鍛翻彼常知暮而况臣哉聞未遑

請臣之懇戀至於隳官臣合書罪無任戰慄懇結之至

為太僕卿

新舊唐書作衛尉卿

劉弘基請致仕表

太宗

上官儀

臣某言臣輕生多幸早逢昌運締構之初得効駑蹇誠欵雖竭功績靡伸沐浴恩光謬叨榮級歷居近要出納隆顯顧循庸菲踰溢涯分思展塵露以酬洪造鏤骨銘肌無忘夙夜但犬馬之齒甲子已多風雨之疾昏眊日甚雖年非致事而力不當官簿領沉迷端緒紕繆久尸厚祿覩懼在躬內省愆尤外慙物議乞解見職退就衡門朽質餘生獲從藥療蠶蒙渥澤未歸泉壤難預朝請瞻望闕庭葵藿微心方希臨照不任悃欵之至伏願天慈特垂矜許輕塵聽

愈增震越

云

云

盧岐州請致仕表

臣某言竊以日月迅驅歎留侯之過隙桑榆易晏嗟趙孟之渴陰是以杖國之儀曩籍之通訓夜行之誡先達之明範臣三河素品一藝罕稱歛衽衡泌之間優游農仕之際特以雲雷肇構龍德在田遂得混吹齊庭薄遊梁苑昧昔賢之先覺慶生涯之嘉會屬大橫固祉獎澤存臻同管蒯之靡遺喻衽席而無改叨竊非據綿歷歲時智能之効寂寥何紀伐擅以茲興刺濡翼由是致譏况乎時迫耄期識用衰耗仲宣體弱遽與年並修齡疾甚亦隨衰及范綏在飾深驚蒲柳之秋葆鬢承冠逾慙仁壽之鏡空貽謗毀坐

文苑英華 卷一百一十五
素官曹虛受之來履薄未均危懼知止之分餘生實所庶
幾披瀝丹愚諒非矯飾伏願大明委照曲遂今請退影閑
扉待終初服倘弊帷未掩密宗少駐擊壤高其自逸高枕
歡其有餘望瑤池之還駕候仙問之歸躅臣筮仕聖朝位
非才授曾微涓滴少答鴻私收請骸骨心顏醜忤微臣限
茲外任不獲拜奉闕庭大馬之戀徘徊何已

代劉幽州請致仕表

臣某言臣海所陋品業尚罕稱歛衽衡泌之間角巾人
山野之際夙安環堵之室罔知榮進之階屬天步方難霸
圖資始遂偶飛龍之會預參汗馬之期既而慶集私門恩
被昆弟歷職內外備蒙選擢承乏三朝于茲三十餘載

微塵髮之効空負亭育之私加以鍾漏已殫齒歷云暮
國之年斯及夜行之懼載深若勉茲衰遲久玷刺舉既取
紊於官曹抑貽誚於通識當今天地休明賢能方軌豈可
以策駑懷祿茹忤昧榮是以量力陳辭料能寫實天鑒凝
遠特希憫照昔廣德休老方開漢室之恩陽元請骸空表
晉朝之惠微臣竊景前懿敢析今澤反初服於東臯沐薰
風於窮巷倘高春少駐弊蓋未陳庶乎瑤池之曲延望白
雲之宴仙問之阿載奉翠華之謁犬馬之志實百怕心臨
表鯁戀辭意懇結云

爲殿中監趙元楷請致仕表

上官儀

臣某言臣聞高年致政前微之彝準仲秋授杖緜載之通

規正以制逮乎桑榆悒陰於鍾漏臣顧惟菲陋輪轅無所
瞻言賓實高謝等夷筮仕之初不期通顯干祿所望抑在
代耕初以生涯多辛屬奉昌數仁被草木德洎昆蛟獎飾
曲流豐恩傍洽言揚德舉內視缺然比彥叅賢載離滋求
至於姬駿長驅奉玄池之廣晏姒龍避疑作遠鶩陪樂野之
宣遊塵露罕稱榮甲共空甚捫躬覲作罔歷心顏旣而二膳
在辰懸輿甫及光華云徂聖造方深蒲柳行秋朽材知止
勝西羗而側一作測測一作測豸惟東都而自收伏請褫帶彤闈歸骸
素里挹清風於國壙諫追盛範於陽元効鈞璜於渭濱類飛
星於河渚是知疲吟駢解馭辭金根而不歸衽席幃幄去青
蒲而方遠望軒屏一而徘徊仰煙霄而鯁戀無任感愧之至

爲工部尚書段綸請致仕表

許敬宗

臣綸言臣質輕散木運忝連姻濫叨右戚之榮曲荷睦親
之禮攀鱗切漢顧毛羽而多慙雕朽成姿撫簪纓而自失
在梁之誚甲子徒深大造之恩消塵靡報常懷戰灼夙夜
無忘况以蒲柳易衰大馬將暮沉痾歲積昏耄日侵雖復
年未杖鄉而疾垂陳力竭陰理務沉迷簿領之書伏枕當
官敢數彝倫之序以尸寵祿事等曠官內省愆尤何顏在
職冒乞骸骨退就廬田庶得休閒微加攝餌則皇天有施
生之惠庸臣免偷安之責倘蒙恩許負岳爲輕但頓慙在
躬方違旦夕仰軒檻而增戀望霄極以長懷伏紙陳誠心
靈戰越不任悲愴之至

為姚大夫請致仕歸侍表

盧藏用

臣某言臣聞孝於親者然後可以忠於君理於家者然後
 可以移於國臣實妄庸叨奉明聖職在樞要切寄股肱恩
 非始圖榮絕流輩臣之殞身無以上答然臣老母今年八
 十有一起居漸廢齒髮日衰飲食朝哺非臣不膳寢興侍
 奉非臣不歡臣欲僂俛國朝則顧復無報臣欲歸養私第
 則聖澤不貲實類羝羊羸角方同狼跋其尾去歲陳乞初
 沐聖恩旋承後命不垂允納良由臣孝道衰廢至誠無感
 扣心泣血夙夜無寧臣自受北征絲歷旬月慈母銜泣朝
 夕倚閭寢膳不時重增羸耗臣子之道何以為心陛下聖
 澤遠覃中外無事彝倫攸叙俊乂盈朝臣之短才無所裨

補伏願少垂矜察俯遂私恩許臣告歸之請終臣犬馬之
 養然後麋軀粉骨上答天造奮身虜庭効命戎幙臣之萬
 死不敢為恨無任愚懇之至

為温給事請致仕歸侍表

武后

崔融

臣某言臣以凡薄幸承基蔭一霑官侶三十餘年為子未
 能報鞠育之恩為臣未能答生成之惠公私覩冒夙夜驚
 惶久欲退奉家園以避賢路直以犬馬識戀木石感恩猶
 希罄竭未即陳吁今臣母虞國夫人妾盧氏行年八十志
 力衰謝體氣虛羸先苦眩癖近微風痲委卧床枕絲歷歲
 時扶人不行加帛不煖比者西京有宅老母在堂臣以留
 司之餘尚接和顏之半自忝膺皇睠祗命神都子奉局而

莫從毋倚間而空切加以門衰祚薄長兄早世昏定晨省
唯臣一身但臣之所以奉檄載馳釋巾從務貪榮徇祿唯
迫於其旨淺知薄能豈期於聞達伏惟皇太后陛下天地
容納雲南霑被祿疑作錄臣勲舊賜臣丘山臣雖小人豈忘
大德然以聖人在上孝理天下整齊風俗砥礪名教臣縱
不才其如禮法何臣雖無識其若朝庭何無任丹血勤懇
之誠謹冒死請闕請罷官歸養奉表以聞方違軒宸伏紙

惶戀云

云

爲王左相請致仕表

李嶠

臣及善言臣愚欵類薦心隨言盡而睿旨彌隆禮以恩酬
固辭則成命有廢勉進則私情不堪惟此憂惶坐交冰炭

臣及善中謝臣志均駑馬知眷戀於軒檻生此瘕疴不
落於風霜思十駕之驅馳迫四時之代序辭稻梁之惠寧
是宿心乞桑榆之年但緣量力昔者主父未達常健羨於
陳鼎孔丘遭難每慙勤於執鞭或排擯於中朝乍栖遲於
列國况臣叨恩竊幸非待營求尸祿効官不假才藝獲當
年之榮貴無曩世之艱虞豈應輕物傲時薄優游之寵官
陳辭抗疏循耿介之名節直以頽齡向盡衰疹踰加二首
六身甲子催其歲月百骸九竅寒溫煎其骨髓無仙童之
却老有災豎之侵年志力昏沉精神耗竭心已迷於方寸
目久暗於玄黃鳩杖扶危且猶不逮鵝池養望孰云非罪
竊畏衆多之口顧思庸短之累昔之少壯猶不如人今也

文苑英華卷第六百三
耄期詎堪經國是用披肝踏地拜手祈天方登月制之辰
庶免夜行之咎言非飾請理實誠陳陛下厚眷殊私尚留
陪於簪履老臣餘喘微息終絕望於軒墀空荷不貲之恩
實無自強之地伏望俯矜疲劣微賜含容免其折鼎之憂
假以懸車之樂尚殘骸未殯尚齒不遺猶望俎豆几筵接
虞庠之庶老歲時朔望陪周行之末班更得拜奉宮闈瞻
觀日月則生涯兼足死將不朽伏蝸廬而獻欵仰龍闕而
翹覓心往形留授簡增欵無任拙疾衰老戀慕屏營之誠
謹遣息清廟臺主簿溫重詣朝堂奉表陳情以聞

文苑英華卷第六百三

文苑英華卷第六百四

表五十二

請致仕二

謝表附

告老乞致仕表一首

請致仕侍親表四首

請致仕表四首

謝恩勅許致仕表一首

代崔公授秘書監致仕謝表一首

爲蕭太師謝致仕表一首

謝分司表一首

告老乞致仕表

宋璟

開元二十年

臣璟言臣聞力不足者老則更衰心無主者疾而尤廢臣

昔聞其語今驗諸身况且兼之何能為也臣拔自幽介欽
 屬聖明才不逮人藝非經國徒以久從驅策歷叅試用命
 偶時來榮因歲積遂得再昇台座三入冢司進階關府增
 邑大郡所更中外已紊彝章逮居端揆尤竊一作右職何
 者丞相官司之長任重昔時愚一作微臣衰朽之餘用慙他
 日位則逾盛人則浸微盡知其然何居而可頃所以二字
 者僂從政蒼黃不言實懷覆載之德冀竭涓塵之効今
 積羸成憊沉痾一作痼莫瘳耳目更昏手足多廢顧將殞越
 寧遂宿心安可苟徇大名仍尸重祿且留章綬不一作上
 闕庭儀刑此乖禮法何設伏惟陛下探一作能以授為官
 而擇察臣之有詞矜臣之不逮使得罷歸私室養疾衡門

上拜官謗下知死所則歸全之望獲在愚臣養老之恩
 於聖代日暮途遠天高聽卑瞻望軒墀大深感戀臣比一作
 此伏枕不堪詣闕無任誠懇之至謹遣男朝請大夫行起
 居郎渾於朝堂奉表陳乞以聞

請致仕侍親表

敬讓

臣某言臣聞事君事親率由之道斯一為臣為子資敬之
 途無二臣實不才累昇榮級徒以家承勲舊地分茅土寵
 命優渥寔此之由非臣妄庸所堪獎拔臣未登壯歲乾隆
 先傾逮于強仕母氏為育欣欣而就祿者希祿養之及親
 也臣雖愚鄙妄佩朝簪臣母王夙侍巾櫛久經憂苦一纏
 風疾二十餘年今秋已來所苦增劇板輿周覽近在於家

園綵服承歡久違於膝下臣謬居藩佐累變炎涼瞻望庭
闈五情紆結雖王臣蹇蹇匪躬之故而孝道蒸蒸因心罔
極伏惟陛下聖明統業孝理天下文軌同於八荒德教加
於百姓况臣沐浴皇化差池班列塵忝滋久臣復何言臣
兄弟之中臣又居長五起三省是臣微志視膳嘗藥非臣
而誰臣之愚誠天地神祇所共昭鑒伏乞天恩少留哀察
臣請解所職侍養京都冀烏鳥之情俯遂終食犬馬之報
希酬萬一臣雖死之日猶生之年無任倥傯一作惶懼迫切之
至

請致仕侍親表

拓跋興宗天寶中

臣某言臣聞懷祿者耻於冒進事親者貴在及時苟養

之榮何報所生之德臣興宗中謝伏奉某月日勅許臣
入京觀省者臣母譙郡太夫人曹氏今八十有四一遭風
疾倍加羸憊臣之戰灼罔知攸從然曹氏有臣更無他子
臣纔齟齬父已背亡守志偏棲鍾情善訓恩深徙宅慈過
折蓼孤危相保臣得成立蕃夷賤末久荷國恩磨鈍策疲
已歷三紀腰金拖紫四昇八命每慙祿厚慮臣身災况老
親在堂迫於衰疾而更晨昏有關尸素無厭碩鼠貽刺林
鳥不若尚叅朝列心豈違安特乞停官許從歸侍則藜藿
之養子道獲申桑榆之暉母心是慰當今大聖御極羣賢
共理豈資微臣而在冗職雙鳧隻鴈寧覺少多九牛一毛
未為增損倘明神見祐母體漸平在臣犬馬敢不驅策伏

文苑英華 卷一百四
望採詩人之錫類鑒令伯之陳情曲降鴻私俯矜微懇垂
恩遂志死將萬足不勝懇款之至

第二表

前人

臣某言臣前表自陳上訴母親乞停所職以就私養聖恩
未許懇願莫從母子二人肝腦塗地臣某中謝臣初孩則
孤未冠而仕不識父兄之教但承慈母之育向母無臣則
烏鳥誰哺向臣忘母則禽獸不若更無性命以至成長今
臣老母八十五載矣加之疾疹日甚一日有增無減一作瘳
湯藥杜口粥食不入頃乃祈恩請命忍死待臣臣不承聖
恩不復見母母不蒙聖造亦不重見臣自從去年漸能開
釋若臣又辭母母更別臣臣母必即倚門氣絕上馬心

母必失臣臣亦失母忠孝雙缺公私並喪假臣強顏苟且
榮寵猶望孝理抑就名教以蕃夷之賤品忝冠冕之清流
身帶三印爵封五等入踐命卿出爲副將正是臣報國立
功榮宗輝戚之時愛惜毛羽保持名位寧可進寸其容退
尺豈願驅一作損華轂以傳板輿樂閑居而忘厚秩士君子
猶貪其富貴臣種類豈知其矯飾母不能割慈忍愛子不
可背義違親二者之心賢愚共悉方寸旣亂焉可以理軍
否藏皆凶焉足以謀敵無自招於遄死則未戰以取亡何
以爲萬人之命赴國家之意陛下於愚臣過聽謂邊將得
人則有隴右專知教練兵馬使右驍衛將軍蘭廷輝材畧
冠軍智勇無對今節度王忠嗣知其名已令攝使替臣如

流輩諸將皆是可惜臣匹夫之勇而不見萬人之敵何抑
烏鳥之衆而不用熊羆之帥一作師陛下必以臣幸無大過
不令失職即望全其官守罷以軍廩減其俸祿以延老母
畧許其宿衛兼遂微臣之定省朝則覲君退還侍母公私
兩遂忠孝並存母子如初生死萬足遠近夷落咸知聲教
無任懇切危急之至

第三表

前人

臣某言臣聞事君愛親出忠入孝孝苟不足忠能獨全自
古及今未之有也臣夙遭凶憫早喪父兄母祗育臣臣唯
侍母更相爲命逮至于今誠願報國安親兩遂忠孝况臣
少從邊役侍養多違母常憶臣積憂成疾往者一辭天闕

六變星霜徒叨守郡之榮終切倚門之望加以老母年
邁邁景晏桑榆衰疾交侵藥弭無主頃乃祈哀上請忍死
侍臣臣幸獲歸寧老母稍安寢息再造之施空荷於乾坤
廣大之恩無階於答効臣又聞子急告父臣急告君今母
若無臣臣定失母所以隳裂肝膽塵犯威嚴乞停臣尸素
之祿假老母殘餘之命誠爲至願非敢飾情自聖鑒未迴
懇誠猶阻而臣又不幸愚子供奉官右威衛郎將守義近
亡臣今惛然形影相弔生人之極無甚於臣老母既見孫
亡預愁臣去舊患未損泣盡繼血伏惟聖主孝理天下特
降綸言戶有老親令蠲賦役鄉有孝子必表門閭洎乎菴
外百蠻咸被教化臣雖戎狄賤品忝沐薰風烏鳥之心實

愧乳哺若使貪榮徇祿背義忘親固天地所不容人倫所同棄更何面目敢列聖朝特望上垂天光俯照愚懇矜臣養親之日短効命之日長乞其停官許令侍疾四夷慕義陛下之德化無窮豈惟微臣獨荷恩施無任迫切屏營之至

請致仕表 憲宗

高郢

臣郢言臣聞量力而仕臣下之審分知止不殆道經之明訓所以七十致仕禮式其期臣犬馬之年去春已滿頃者方欲陳乞屬蒙新授今任忻時忘老祗命戀恩復屬王師出征聖軫方切輒求安退又所不敢伏惟睿聖文武皇帝陛下德廣天地道孚干羽承宗順命服罪効誠制誥班師

萬方軌道昆蟲草木各遂其性臣早當告謝無忘夙心不應遲回更俟終日况復夏官任重賢路久妨時制已過衰疾兼甚實懼夜行之罪上累明時之寵伏乞許遵恒典特賜餘年止物議之貪榮洽宸慈於休老微臣之願庶蒙矜允臣竊惟塵曠謬迹三朝叨承睿獎中外六任竟無毫髮上答恩私齒盡請骸終慚且惕徘徊積戀戰汗陳愚天闕一辭朝車未稅方從野老共樂堯年臣郢不勝感恩兢惶之至

第二表

前人

臣郢言臣上陳丹懇非敢飾辭前月二十三日中使梁士平奉宣旨賜臣還詔聖慈曲念未忍棄捐綸音下臨特加

文苑英華 卷一百一十四
六
褒獎心魂震悚拜舞覲容臣某中謝臣血氣既衰戒之在
得鍾漏云盡行者當止臣今所乞已過常期若志悅前言
事違徃行雖稱守命誰曰非貪况臣升朝以來歷忝清貫
歲時曠久叨疑作用篋聞前恩無報後効焉取使蚤負山
欲強何由臣伏以戀主之心古今齊致暫從外補猶所不
樂水違闕庭豈違勇退竊以菌蟪生促無幾光陰駑駘齒
窮匪任衡軛加以疾疹時發筋力日耗與曠宮而叨寵寧
量已以乞恩庶蒙聖鑒昭回愚悃特許臣得從時休息以
禮進退免於黃耆猶負素食全度庸微生成莫大天無私
覆冀收惠渥歲不與臣敢忘披露再黷宸聽辭隨涕零臣
郢不勝感戀競戰之至

第三表

前人

臣郢言再表陳情一心仰施瞽言無感宸眷不廻今月四
日中使魏寶義至奉宣進止賜臣還詔倍加榮獎未乞愚
衷驚寵循涯伏躬煩越臣某中謝臣聞勞生佚老天理自
然蠕動翾飛口入皆息時不期而必至物雖強而無由禮
經所以制限疲薶所以獲退自非貢禹之守終據古趙嘉
之正身匪懈韓暨之志一作非節高紫山濤之道德模表人
皆顧望禮以至公縱過常期詎爲貪冒其有當仁不讓急
病忘身豈止君命猶宜自舉故魏伐秦師唐睢請車而
說漢謀邊將充國對無踰於老臣所謂臣事君以忠君
使臣以禮忠無不納禮亦從宜如此則選舊任能足供國

用優年加惠得遂時歸古之進退鮮不由此臣以不才叨
辱高位幸而免戾年及乞骸苟蒙得請之恩實受終身之
賜若叨榮不作當退而留則上累皇明下重臣罪况臣自
少力薄不知等夷年老氣衰見孰疑作羸憊形因榮弊疾
與齒并營衛每垂膝脛多痺既憂廢職又懼妨賢内外交
攻生涯轉迫窮暮之懇不遑起居芻蕘之辭已罄肝膽一
物有關於亭毒容光時假於照臨顧西山而骸日瞻北闕
以馳心臣郢不勝戰惕感戀之至

謝致仕表

孔幾

臣某言臣聞七十致政禮經格言此蓋先王立教示人有
終也苟或冒榮貪祿不知其退亦縉紳之醜也今臣年已

過矣耄亦及之顧盼班行每懷慙醜幸屬聖明御宇多士
盈朝百度既貞萬靈遂性躍魚戲在藻之樂野夫盡擊壤
之歡微臣叨逢此時得以陳露而猶進不知止懼損明風
况齒髮已衰筋力不逮雖力官次恐貽貽闕伏以南宮左
轄華省紀綱政理所關選用爲重豈臣衰朽久膺此任伏
乞聖鑒察臣誠懇賜臣骸骨歸老丘園所冀聖朝無浮食
之人微臣免強飯之責將違聖代戀闕誠深無任悃款之
至

謝恩勅許致仕表

睿宗

李嶠

臣某言伏奉恩勅聽臣致仕祗服慈造不勝銘戴臣本無
器識素乏材能幸屬時來屢蒙朝獎虛受榮遇迄無成績

光陰漸迫衰疾常留二監頻侵十旬每曠懼忝腹心之寄
遂陳骸骨之請天情曲獎聖准旁流殷昝調梅雖輟參議
漢藩剖竹仍叨卧理百城肇案六疾彌加竟虧露冕之功
俄錫懸車之寵方循初服退守故園忘機求漢水之翁擊
壤就堯衢之老歌太平而來日飲聖澤而窮年林壑長辭
俟卉未而俱稿雲霄坐隔仰闕庭而增慕無任犬馬悽戀
之至謹因留守起居使奉表陳謝以聞謹言

代崔公授秘書監致仕謝表

常衮

臣某言伏奉恩制授臣銀青光祿大夫秘書監仍聽致仕
臣聞不修其德老常見遺無益於時祿不虛詔伏惟陛下
以大聖撫一作運以至公宰物凡在爵秩必俟賢能况茲

寵異豈及駑朽臣官歷五朝年踰八十勤勞莫効齒髮
衰舊好同遊索然已盡經行郡國不見一人歡娛且少形
魄如寄古之養老義在師臣必公卿大夫耆年多疾乃有
詔書褒勞之寵靈壽安車之賜不然則高尚之士亦以道
存非閔仲之潔清姜肱之孝行固不可猥承嘉命特受殊
禮今陛下以臣之甥任在樞近階緣厚遇曲被鴻私官品
過崇越於班列疵賤忽貴枯瘁增華親戚相榮以感以涕
猶復恤其羸憊貸以休閒成一作周禮四方之適存漢儀
八月之間惠養益厚等威益尊冒恩不訾仰戴無力殘生
有幾上報一作答何階無任感戴一作荷之至

一作皆唐類表

為蕭少師謝致仕表

德宗

高郢

臣斯言伏奉今月二十三日制除臣太子少師致仕仍給半祿料其晏會及朝朔望並依常式者桑榆暮齒忽遂休閑犬馬微誠仍叅朝會臣其中謝臣本書生資於巾褐每歷清列尸曠徒深早迫流年止足有素特以四朝受任千載逢時難勝戀闕之心久滯乞骸之疏陛下俯憂羸老曲被庸愚三印之辰更加新命懸車之後且許時朝榮賜俸祿澤深惠養昊天罔極思上報而無階餘日幾何奉湛恩而不朽無任感戴忻忭之至

謝分司表

劉禹錫

臣某言伏奉今月十九日制書授臣太子賓客分司東都

者寵命自天戰越無地臣某中謝臣發迹書生以文為業出身入仕四十餘年頃自集賢具學士出守吳郡面辭之日親承德音念百姓水潦之餘示微臣政理之法臣祇承集庸聖旨夙夜竭誠間里獲安流庸盡復猥蒙朝獎錫以金章及遷同州又遇歎旱悉心綏撫幸免流離今荷天慈憫臣耆舊列名賓護之職分局河洛之都老馬霜束帛之恩枯株蒙雨露之澤獲居榮秩以畢餘年顧此微軀實為厚幸伏以臣始為御史逮事德宗今忝宮僚幸逢聖日舉四海之內賢能則多求六朝之臣零落將盡雖迫桑榆之景猶傾葵藿之心無任感恩惕抃之至

下卷第六百四

文苑英華卷第六百五

表五十三

太子公主上請

僧請附

皇太子請停幸東都表一首

皇太子請家令寺地給貧人表一首

皇太子請放罪囚表一首

皇太子請復膳表一首

皇太子請起居表一首

皇太子請給庶人衣服表一首

皇太子請脩書表一首

皇太子請加相王封邑表一首

為太平公主請住山陵轉一切經表一首

為太平公主辭欲起新宅表一首

為魏國北寺西寺請迎寺額表一首

為人請子弟出家表一首

為東都僧等請留駕表一首

為洛下諸僧請法事迎秀禪師表一首

皇太子請停幸東都表 高宗 崔融

臣某言臣聞乘雲駕羽者非以逸樂其身觀風設教者將

以弘濟於物故後予胥怨幾 一作 望湯來吾王不遊嘗思

禹會伏惟天皇察帝道敷皇極一日二日智周於萬幾先

天後天化成行 一作 於四序雖鴻名已建銘日觀而知尊而

膏澤未流御雲臺而不懌市朝之邑天地所中四方樞 一作

會百物阜殷爰降恩旨行幸東都然以星見蒼龍目

朱鳥清風用事庶彙且繁桑翳葉而眠蠶麥飛芒而雉

詳求易緯是君無發衆之辰博訪禮經當人急勸農之月

固未可陳詩展義拜洛觀河况序屬 一作 陽時方避暑

露臺風館尚多薰灼之勞帳殿惟宮將有鬱蒸之弊天皇

昔常服餌近更躬親睿情勤苦天儀憔悴若何以萬乘之

重四海之尊暴露而行旰日而食者也加以官僚扈從或

少資糧程期迫促未遑周辦必若事應巡狩 一作 務從寬

恤猶望白露涼風然後清畿洒道下不違於人欲 一作 上

無隔於天心可舉而行庶幾於此臣又聞關中屬縣畿內

傍州百姓驅馳頗多饑餒天皇仁深覆育並令賑贍求轉

徒者任其逐糧欲寧居者加其廩食家懷再造人得安全
乞至秋來不煩聖慮特乞少留玄鑒俯察丹誠廻太陽之
末光納蒙泉之餘瀝臣三朝問寢常候色於宸慈五日詣
臺每承言於聖獎輒陳冗職輕進芻詞踏地知驚窺天自
失無任私懇之至謹遣某官奉表以聞

皇太子請家令寺地給貧人表 前人

臣某言臣聞法天之道義屬於有餘象地之宜理存於益
寡頃以咸城近縣鄜市傍州頗積風霜或侵苗稼天皇兩
儀合德百姓爲心發倉廩以賑貧人垂雨露以滋微物俗
荷財成之施家懷亭毒之恩臣濫奉宗祧親承覆載歲時
衣服咸憑府藏之餘朝夕膳羞必佇饗餼之辦過此以往

臣亦何求但知問豎寢門尊師胄序魏兩文儒之盛竊所
係心漢儲湯沐之資未嘗留意但關輔之地萌庶孔殷丁
壯受田罕能充足所以水旱之歲家室未豐正末端本思
有裨助臣家令寺有地九百餘頃特請廻授關中貧下等
色雖地非安邑寧期千戶之封而價等露臺虛費十家之
產伏乞皇恩遠及聖澤旁流矜臣愚効遂臣誠請謹遣某
官某奉表以聞

皇太子請放罪囚表 前人

臣某言臣聞堯舜推心諒因於百姓禹湯責已必在於至
一作人頃以炎亢踰時資儲頗乏天皇情勤戒慎務切憂
勞發倉廩以調窮罷珍羞而酌損紅粟未阜愈競御朽之

懷白粲有形特軫推溝之念爰降恩旨俯加寬恤凡在生靈不勝鼓舞然以和風所被蘭茝同榮膏雨所流公私並潤徒刑之輩已沐於深慈杖罪之流未霑於厚渥且五刑之內咎坐爲輕兩造之間原情可恕時當慘勁命甚漂浮因茲決罰或從顛躓伏乞迎春布澤應天道而無違任地成功順人時而不奪使三農有望萬物知歸臣濫守儲闈叨陪帝幄乾坤覆載荷至德而徒深日月昭明在末光而何助無任區區之至

皇太子請復膳表

前人

臣某言臣聞善特國者舒慘必繫于天時德稱皇者動靜莫違于物理故百姓不足一人所以載懷四海爲家萬方

由其在慮伏惟天皇觀風設教拜洛遊河光華前乎日月

法象齊乎天地頃以歲儲微耗年穀未登睿旨憂勞宸一作

情戒惕菲飲食而卑宮室居常夏禹之期減厨膳而徹

一作鍾懸重取黃軒之事由是神靈盼饗景氣氤氳雪千

里而朝飛兩四溟而夜下兩河之甸瑞麥盈疇三川之境

嘉苗被隰天意人事其在茲乎可以隨道抑揚可以與時

通變周王之本枝百代每進鱣庖殷帝之亢旱七年猶資

鶴鼎昔賢具稱其美往聖不議其非唯此小心將乖大德

臣又聞下之奉上猶枝附根君以人作基人以君爲命天

皇恩深于育念切家安損已勵精無違早晏停滋罷味已

隔歲時聖躬有勞悴之容群類動競惶之責伏乞俯從人

欲仰順靈心具珍物以登羞隨太陽而復膳蕙蒲知送涼
之地芝英識駐壽之期豈使眇眇燧皇獨流名於膳炙悠
悠黃帝空紀稱於庖犧而已哉臣寄忝元良任當監守春
冬冒序學書禮而空勤朝夕寢門視寒溫而未即無任悃
款之至謹遣某官奉表陳請以聞

皇太子請起居表

高宗

前人

臣某言今月某日起居舍人某至

一作還

伏承聖躬頃稍不

安今已痊復手舞足蹈慶躍兼深臣聞孝於事親為子之

方以

一作已

極恭於奉上為臣之道則先臣自違侍軒墀已

淹時序周儲故事一日三至於寢門晉兩

一作室

舊儀一月

五朝於左

一作龍

閣今之望古臣獨何人日者瀝膽陳祈焦

心覲謁伏惟天皇以關河鎮重監守務殷睿旨冲邈未垂

矜亮今既十月築場三農事隙特乞暫流恩召俯念單誠

遂以起居假以時月得晨拜旒宸遂

一作展

臣私情則暮辭

闕庭在臣無恨不勝戀慕之至謹遣某官奉表陳請以聞

一作皆唐類表

皇太子請給庶人衣服表

前人

臣某言臣聞心有所至諒在于聞天事或可矜必先於斗
帝庶人不道徒竄巴州臣以兄弟之情有懷傷憫昨者臨
發之日輒遣使看見其緣身衣服微多故弊男女下從亦
稍單薄有至於是雖自取之在於臣心能無憤愴天皇衣
被天下子育蒼生特乞流此聖恩霈然垂許其庶人男女

下從等每年所司春冬兩季聽給時服則浸潤之澤曲霑
於螻蟻生長之仁不遺於蕭艾無任私懇之至謹遣某官
奉表陳請以聞

皇太子請修書表

前人

臣聞昔者明王學以化人成俗古之君子文以締地經天
雖有閩風之高嶽弗登弗知其峻也雖有浴日之巨溟弗
涉弗知其廣也伏惟天皇域中居大天下化成百官以理
萬人以察日行中道而淑清歲起攝提而位序光薰萬物
豈直芝珥萱苴澤加一作施四海寧惟壽麻孤竹地成形而
天成象其道彌光河出圖而洛出書其徵可驗環林壁沼
金門石室墳典積于丘山筆墨盈于泉海聖朝多士自可

包二代之文臣顧不才何足奉三王之教皇慈渥洽帝獎
優隆擢公望爲太師徵子房爲少傅所冀習與智長化與
心成嘗辛苦於歲餘終未階於日就臣聞學者殖也問以
辨之積必有成勤則不匱以周公之上聖日讀百篇以孔
父之多能常編三絕臣雖不敏竊所庶幾然以列代遺章
先王舊典康成興業纔覽卷於八千士安覃思願加年於
累百豈不以學而時習博則難精者乎今欲舉其蕭稂撮
其樞要可以出忠入孝可以益國利人極賢聖之大猷蓋
今昔之能事商權百氏勒成一家庶有代於箴規長不違
於左右又近代書鈔寔繁部帙至如華林園編畧修文殿
御覽壽光書苑長洲玉鏡及國家以來新撰藝文類聚文

思博要等竝包括弘遠卒難詳悉亦望錯綜群書刪成一
部藝官賓館亦既天皇立之矣端士正人亦既天皇致之
矣伏乞俯從微願特降鴻私許臣撰緝遂臣誠請當宮學
士如少仍望通取京官謹當開桂樹之山鑿芙蓉之水引
甘泉之詞賦惣望園之賓客下芸閣而長謠臨梓厨而高
會一遊蘭芷佇變蓬麻區區之誠敢希矜允豈使蕭城門
內唯傳魏國之名崇政殿中獨紀晉朝之事而已無任誠
懇之至謹遣某官某奉表陳請以聞

皇太子請加相王封邑表

李嶠

臣某言臣以相王旦發彩璿萼承流寶派雖班彝錫瑞旣
同於伯叔之封而食菜苴茅不逮於子男之國敢緣敦叙

之義輒獻由衷之誠而葵藿傾心徒希皇矣之鑒雲霄絕
望不流霈然之澤愴怛如失徘徊增佇臣某誠惶誠恐頓
首頓首死罪死罪臣聞命以車服錫之土田實將共安邦
家永固宗祐炎漢之開藩樹屏屢開七十城隆姬之書社
建侯封疆四百里故知業隆者基大本盛者末豐涯涘闊
而潤澤深枝條繁而庇蔭遠伏惟皇帝陛下握河開曆截
海凝圖化縣於商夏之朝地廣於唐虞之域裁舊典之損
益補前王之闕漏萬官咸事百度以貞雖穆穆之風具宣
於政理而親親之道或廢於揖謙至今骨肉禮薄藩維業
曠曲阜之特高才藝仍減附庸平臺之深篤孝慈僅留湯
沐徽章空列於五等祿秩不踰於九命曦舒兼曜之德义

被於寰中雲雨曲成之恩翻遺於膝上異強幹弱枝之道
違先親後踈之意非所以上宗王室下睦帝姻况天垂後
星承髮膚者蓋鈔卦膺習坎奉晨昏者非衆荷圓穹之寶
覆籍厚載之珍腹若令寵數不加等威無辨便是卑萬乘
之尊蔭缺四海之遐瞻蠻貊荒陬猶知不可衣纓士庶孰
謂其宜伏念天倫深惟國體情實存於公道理不涉於私
求伏願曲降聖慈俯收愚懇愜久遠之大義抑冲撫之小
節疇咨故實申命有司劃以山川優其井賦剖符開國依
希魯衛之親盤石居宗髣髴應韓之躅明鳩鳩均養之惠
慰鵲鴿同氣之心使麟趾式安犬牙愈一作逾固則洪恩所
被允及於萬方靈貺一作慶所覃豈惟於九族無任悃欵屏
營之至謹遣某官某奉表陳請以聞

爲太平公主請住山陵轉一切經表

前人

妾某言妾生涯有緣仰繫皇極孝行無感上傾乾蔭號天
罔極扣地不追集蓼萌心茹荼泣血自攢關東洛紉下西
秦氣朔道移光靈浸遠怨晨昏之易隔悲節叙之難留舉
目摧傷觸途殞裂今橋山已耐藥水還封二曜停臨九天
絕仰慟遺弓於此日思稅駕其何年追想平居永惟曩載
粵自襁褓迄於成立鍾慈結愛殆欲蒙携於掌上候色承
顏何嘗暫離於膝下方倚南山之固長承北極之尊豈圖
就養之歡遽乖於扇枕問安之地翻類於過隙念凶妨而
自咎思顧復以何酬所冀扶杖墻坐結廬山隧瞻奉觴奠

依憑園寢終三年之禮企及通喪轉一切之經庶邀冥福
上以資未來之果下以摠罔極之心伏惟陛下孝通神明
仁泊草木乞體荒疾特垂憐許使烏鳥微志獲與耘禽致
哀犬馬孤誠得從耕象申慕則窮喘無恨餘生知幸無任
哀切之至謹附使具官某奉表陳請以聞

為太平公主辭欲起新宅表 見五百七十八卷

留箴 前篇作 垂箴 畝價 前篇作 畝賃 前人

為魏國北寺西寺請迎寺額表 武后 李嶠

沙門臣某等言竊聞加隆園寢漢道以光潔誠宗廟周卜
惟永斯但禮極崇奉事昭嚴配未能遵揚七覺酬顧復於
前生幽贊三途樹津梁於後劫伏惟聖母神皇陛下中天

構極截海疑圖懸法日而貞觀沈慈舟而利涉天經地
之德率禮因心奉先追遠之誠宅緣證果弘濟深於冥境
薰修入於梵門天子之孝感陰陽而通鬼神聖人之心刑
萬邦而被千祀乃者深發睿思求懷遺躅禱帷轍跡之所
蓋建寶坊南北東西之城咸脩法宇佛刹周於天壤寺名
因於國號自崇陽改謚奉明增邑雖配天盛典已革於常
數而淨境大名尚題於舊額是以稻麻眾侶葵藿微心願
弘金石之名思降瓊瑤之禮 疑作 札 愚言聖澤已蒙昭許日
往月來未遑迎致今望以九秋嘉節七月良辰當登筵之
初滿屬盃蘭之始獻勝幡香蓋延寶字於金門法鼓天花
奉鸞書於象闕俾夫道路瞻仰虛空具讚高懸銀榜豈惟

天地之宮列署瑤房遠邁神仙之宅某等或扮榆故社或
桑梓舊京謬參龍象之筵預奉衣冠之列白雲千里瞻帝
鄉而極目朱門九重望宸陛而延首倘皇慈曲被人願不
違則八部式歌四海知幸無任懇倒之至 聖澤 疑作 聖澤

為人請子弟出家表

陳子昂

臣某言臣以險豐私門不造亡父故某官先臣某早先朝
露求謝休明日月不居星紀云暮伏以先臣榮綰章綬累
忝榮私三歷名卿職參於河海八居物守任切 集作 於股
肱而報効莫聞零落先及啓足 英華作 發足非之日露首知慙是
以臣克奉誥 集作 話言志期冥報請以當家子弟三兩人奉
為高宗大帝出家歸道而孤煢在疾遺囑未申奉以哀號

實貫心髓今者高宗大帝登仙之忌已及茲辰先臣懇
未効他日所以乞遂冥願敢覬天恩庶菩提之因發揮於
正覺涅槃之證幽讚於宸階先臣夙心無恨於 集無 於字泉壤
伏願上天降鑒微誠可哀因緣獲展存沒交慶不勝崩迫
之至

為東都僧等請留駕表

中宗

宋之問

臣僧某等言臣伏見某日月勅以今月十九日 集作今 年九月將

幸長安東都道俗不勝攀戀伏惟應天皇帝陛下重興靈

命并造黎元域中懷三聖之恩天下識吾君之子關西帝

宅渭北神臯思切園塋未謁長陵之樹貴為天子不歷咸

陽之宮宜應萬乘巡遊展鎬池之新慶三秦故老覩漢家

之舊儀率土顛顛孰不欣躍但以先後神寢夏首方成太子仙墳秋中未畢王主陪奉更促工徒雖力以子來而頗妨農事倘千官扈輦同費太倉之粟萬國來庭共索長安之來將何給用以濟公私且東都有河朔之饒食江淮之利九年之儲已積四方之賦攸均誠宜宅幸三川寬縫八水稍登稔歲方事歸鑿以欲從人孰不幸甚則天聖后久成佛果俯應輪王冀發無邊之巨願光有為之妙福經始大像年籥滋深愧緇流之淨財念蒼生之苦力俯從群議莫遂聖情陛下孝感傍通冲襟獨斷追成先志上合天人故得蓮礎未施為停風雨梅梁鬱起若有神明施其力者萬殊莫分龍鬼捨其財者千計豈辨人祗岌已集作千雲

程之匪日實冀金輿近幸玉輅親臨禮如來之大身畢生聖之遺旨然後載詣京輔馳謁山陵即付囑無違情禮兼極無任懇款戀慕之至

為洛下諸僧請法事迎秀禪師表

前人

僧某等言某聞住持真教先憑帝力導誘將來遠屬能者伏見日月勅遣使迎玉泉寺僧道秀陛下載弘佛事夢寐斯人語程指期朝夕詣闕此僧契無生至理傳東山妙法開集作室巖集作齋集作居年過九十形彩日茂弘益愈深兩京學徒群方信士不遠千里同赴五門衣鉢魚頡於草堂菴廬鴈行於竹帛集作雲集霧委虛往實歸隱三楚之窮林繼一佛而揚化栖山好遠久在荆南與國有緣今還豫北

九曲集作江道俗戀疑作愛之如父母三河士女仰之猶山嶽

謂宜緇徒野宿法事郊迎若是集作使輕來赴都遐邇失望

威儀俗尚道秀所忌崇敬異人和眾之願倘得焚香以遵

法王散花而入道場則四部銜恩萬人生善無任懇欵之

至謹詣闕奉表請與都城徒眾將法事往龍門迎道秀以

聞輕觸天威伏深戰赴

文苑英華卷第六百五

九曲子道俗變之如父母三河士女仰之猶山嶽
謂宜緇徒野宿法事郊迎若是輕來赴都也迺失望
靈霞俗尚道秀所忌崇敬異人和衆之願倘得焚香以避
決王散花而入道場則四部街恩萬人生喜無任懇款之
至謹請闕本表請與都城徒衆將法事往龍門迎道秀以
聞輕觸天威伏深戰赴

文苑英華卷第六百五

